

**Kesederhanaan Teras Dasar Luar Malaysia, Kata Anifah Bernama
17 Januari, 2012**

KUALA LUMPUR, 17 Jan (Bernama) -- Kesederhanaan sememangnya menjadi teras dasar luar Malaysia, dan ia telah terbukti menjadi elemen yang berjaya mengekalkan hubungan baik antara negara-negara.

Menteri Luar Datuk Seri Anifah Aman berkata dalam mengendalikan hubungan antarabangsa, Malaysia telah memastikan negara menggunakan pendekatan mengikut peraturan, mengadakan perbincangan konstruktif, rundingan, dialog dan perbincangan lanjut, menyifatkannya sebagai wadah kesederhanaan.

"Saya percaya semua pendekatan ini telah dicuba dan diuji dan berjaya sejak bertahun-tahun lamanya," katanya pada majlis makan tengah hari bagi meraikan 350 perwakilan yang menghadiri Persidangan Antarabangsa Pergerakan Moderat Global (ICGMM) di sini Selasa.

Sebagai sebuah negara berbilang kaum, Malaysia mempunyai asas kukuh dalam mengamalkan toleransi, katanya dan menurutnya beliau percaya itu merupakan nilai paling penting dalam hubungan antara negara-negara.

"Kita tidak boleh harapkan orang lain untuk bersikap bertolak ansur dan menerima sekiranya kita tidak bersikap sedemikian kepada orang lain," kata Anifah.

Anifah menyifatkan sokongan terhadap pergerakan moderat global yang diilhamkan oleh Perdana Menteri Datuk Seri Najib Tun Razak semakin meningkat.

Menteri Luar itu berkata dunia perlu bersatu untuk mengekang ideologi ekstremis daripada diterjemahkan kepada tindakan keganasan dan perkara itu dapat dilakukan menerusi amalan kesederhanaan.

"Dengan saling bersatu, simfoni kesepaduan suara kita bukan sahaja akan didengar, tetapi akan menenggelamkan suara golongan ekstremis," katanya.

ICGMM dirasmikan oleh Najib.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=640700>